



Կարգապահական գործ թիվ ԿԳ-18164

Հայաստանի Հանրապետության փաստաբանների պալատի խորհրդի
2019 թվականի մայիսի 8-ի թիվ 78-րդ ԿԳ նիստի

Ո Ր Ո Շ ՈՒ Մ ԹԻՎ ԿԳ/46-Ա

**ՓԱՍՏԱԲԱՆ ԳԵՐԱՍԻՄ ՀԱՐՈՒԹՅՈՒՆՅԱՆԻՆ ԿԱՐԳԱՊԱՀԱԿԱՆ
ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ
(ՎԵՐԱՊԱՏՐԱՍՏՄԱՆ ԴԱՍԸՆԹԱՑՆԵՐԻ ԳՈՐԾՈՎ)**

Հայաստանի Հանրապետության փաստաբանների պալատի (**այսուհետ նաև՝ Պալատ**) խորհուրդը (**այսուհետ նաև՝ Խորհուրդ**), նիստը նախագահող՝ Հրանտ Անանյանի, Խորհրդի անդամներ՝ Գայանե Դեմիրջյանի, Տիգրան Խուրշուդյանի, Նելլի Հարությունյանի, Արայիկ Ղազարյանի և Կարեն Մեժլումյանի կազմով,
քարտուղարությամբ Նոննա Համբարձումյանի,
քննության առնելով փաստաբան Գերասիմ Հարությունյանին (արտոնագիր՝ թիվ 914) կարգապահական պատասխանատվության ենթարկելու վերաբերյալ հարցը,

Պ Ա Ր Զ Ե Ց՝

1. Կարգապահական վարույթ հարուցելու առիթը և հիմքը.

«Հայաստանի Հանրապետության փաստաբանական դպրոց» հիմնադրամի (**այսուհետ նաև՝ Դպրոց**) կողմից 28.11.2018թ. (մուտք՝ 29.11.2018 № 3441-18) ներկայացված տեղեկանքի համաձայն՝ փաստաբան Գերասիմ Հարությունյանը (**այսուհետ նաև՝ Պատասխանող**) 2018թ. առաջին կիսամյակի (հունվար-հունիս (ներառյալ)) ընթացքում չի մասնակցել պարտադիր վերապատրաստման դասընթացներին և չի լրացրել պարտադիր վերապատրաստման որևէ ժամ:

2. Կարգապահական վարույթ հարուցելու մասին որոշումը.

ՀՀ փաստաբանների պալատի նախագահի առաջին տեղակալի 10.12.2018թ. թիվ 432-Ա/ԿԳ-18164 որոշմամբ կարգապահական վարույթ է հարուցվել փաստաբան Գերասիմ Հարությունյանի նկատմամբ՝ «Փաստաբանության մասին» ՀՀ օրենքի (**այսուհետ նաև՝ Օրենք**) 19-րդ հոդվածի 1-ին մասի 4.1 կետի, 45.12-րդ հոդվածի 2-րդ մասի և Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված Փաստաբանի վարքագծի կանոնագրքի (**այսուհետ նաև՝ Կանոնագիրք**) 2.8.2 ենթակետի խախտման հատկանիշներով:

14.12.2018թ. կարգապահական գործը հանձնվել է Պալատի խորհրդին:

Խորհրդի նիստը տեղի է ունեցել 2019 թվականի մայիսի 8-ին, ժամը՝ 18:44-ին, ՀՀ փաստաբանների պալատի վարչական շենքում (ք.Երևան, Զաքիյան 7-2, 4-րդ հարկ, թիվ 12 սենյակ):

3. Պատասխանողի համառոտ բացատրությունը.

29.01.2019թ. Պալատ մուտքագրվել է փաստաբան Գերասիմ Հարությունյանի դիմումը, որով վերջինս հայտնել է, որ տեղի է ունեցել թյուրիմացություն, քանի որ ինքը 2018 թվականին մասնակցել է Լոռու մարզում կազմակերպված դասընթացներին, ուստի հաշվի առնելով վերը նշվածը խնդրել է իր նկատմամբ հարուցված կարգապահական վարույթը կարճել:

Դիմումին կից ներկայացրել է դասընթացներին մասնակցած փաստաբանների ցուցակների պատճենները:

Փաստաբան Գերասիմ Հարությունյանը թեև պատշաճ ծանուցվել է կարգապահական նիստի վայրի, օրվա և ժամի մասին, սակայն Խորհրդի նիստին չի ներկայացել:

4. Գործի հանգամանքները՝ առկա ապացույցների վկայակոչմամբ.

Պալատի խորհուրդը՝ ուսումնասիրելով գործում առկա գրավոր փաստաթղթերը, հաստատված է համարում հետևյալ փաստերը.

1) 2018թ. առաջին կիսամյակի (հունվար-հունիս (ներառյալ)) ընթացքում Լոռու մարզի Վանաձոր քաղաքում կազմակերպվել է վերապատրաստման դասընթացներ 4 (չորս) և 8 (ութ) ժամաքանակով:

Նշված փաստը հաստատվում է Պալատի վերապատրաստման հարցերով համակարգողի 08.05.2019թ. տեղեկանքով:

2) 2018թ-ի առաջին կիսամյակի (հունիս-հունվար (ներառյալ)) ընթացքում Գերասիմ Հարությունյանը մասնակցել պարտադիր վերապատրաստման դասընթացներին և լրացրել կիսամյակի համար նախատեսված 12 (տասներկու) ժամը:

Նշված փաստը հաստատվում է Պալատի վերապատրաստման հարցերով համակարգողի 08.05.2019թ. տեղեկանքով:

5. Պալատի խորհրդի պատճառաբանված եզրակացությունը և որոշումը.

Հիմք ընդունելով Պալատի խորհրդի կողմից հաստատված փաստերը, դրանք հիմնավորող գործում առկա ապացույցները և քննարկվող իրավահարաբերությունները կարգավորող կանոնները, Պալատի խորհուրդը գտնում է, որ փաստաբան Գերասիմ Հարությունյանի նկատմամբ հարուցված կարգապահական վարույթը ենթակա է կարճման՝ հետևյալ պայմանաբանությամբ.

Օրենքի 45.12-րդ հոդվածի 2-րդ մասի համաձայն՝ փաստաբանը պարտավոր է անցնել փաստաբանների պալատի խորհրդի սահմանած կարգով և ժամաքանակով վերապատրաստման դասընթացներ, որոնք չեն կարող երկու տարվա ընթացքում քառասունութ ժամից պակաս լինել:

Հայաստանի Հանրապետության փաստաբանների պալատի կանոնադրության 16.5 կետի 24-րդ ենթակետի համաձայն՝ Պալատի խորհուրդը, որպես գործադիր մարմին հաստատում է փաստաբանների վերապատրաստման կարգը:

Կանոնագրքի 2.8.2 ենթակետը սահմանում է, որ փաստաբանը պարտավոր է Պալատի խորհրդի կողմից սահմանված կարգով և ժամաքանակով մասնակցել Օրենքով նախատեսված վերապատրաստման դասընթացներին:

Պալատի խորհրդի 22.02.2019թ. թիվ 4/11-Լ որոշմամբ նոր խմբագրությամբ հաստատված Փաստաբանների վերապատրաստման կարգի (այսուհետ նաև՝ Կարգ)

1-ին կետի համաձայն՝ *փաստաբանների վերապատրաստման կարգը (այսուհետ՝ Կարգ) կարգավորում է փաստաբանների վերապատրաստման դասընթացներ անցնելու, այդ թվում՝ ընթացակարգի, ժամկետների, ժամերի հաշվարկի, պատասխանատվության և հաշվետվողականության, հետ կապված հարաբերությունները:*

Կարգի 9-րդ կետի համաձայն՝ *վերապատրաստման դասընթացները կազմակերպվում են ըստ կիսամյակների, բացառությամբ Կարգով նախատեսված դեպքերի: Կիսամյակի հաշվարկը՝ ա) սկսվում է հունվար ամսից և ավարտվում հունիսին (ներառյալ), կամ բ) սկսվում է հուլիս ամսից և ավարտվում դեկտեմբերին (ներառյալ):*

Կարգի 10-րդ կետի համաձայն՝ *յուրաքանչյուր կիսամյակի (վեց ամսվա) համար փաստաբանը պետք է անցնի նվազագույնը 12 (տասներկու) ակադեմիական ժամ (այսուհետ՝ ժամ, 1 (մեկ) ակադեմիական ժամը հավասար է 40 (քառասուն) րոպեի) ժամաքանակով (այսուհետ՝ Նվազագույն ժամաքանակով) վերապատրաստման դասընթացներ:*

Նշված կանոնների վերլուծությունից հետևում է, որ փաստաբանը պարտավոր է անցնել վերապատրաստման դասընթացներ, որոնք չեն կարող երկու տարվա ընթացքում 48 ժամից պակաս լինել, իսկ Պալատի խորհուրդը որպես գործադիր մարմին սահմանում է փաստաբանների վերապատրաստման կարգը և ժամաքանակը:

Փաստաբան Գերասիմ Հարությունյանի նկատմամբ սույն կարգապահական վարույթը հարուցվել է այն հիմքով, որ վերջինս, խախտելով «Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի, 45.12-րդ հոդվածի 2-րդ մասի և Կանոնագրքի 2.8.2 ենթակետի և Կարգի 9-րդ և 10-րդ կետերի պահանջները, 2018թ. առաջին կիսամյակի (հունվարից հունիս (ներառյալ)) ընթացքում չի մասնակցել պարտադիր վերապատրաստման դասընթացներին:

Պալատի խորհուրդն արձանագրում է, որ փաստաբան Գերասիմ Հարությունյանը 2018 թվականի հունվար-հունիս (ներառյալ) ամիսներին մասնակցել է վերապատրաստման դասընթացների և լրացրել 12 (տասներկու) ժամ ժամաքանակը:

Մինչույն ժամանակ Պալատի խորհուրդը հիմք է ընդունում Պալատի վերապատրաստման հարցերով համակարգողի տեղեկանքն առ այն, որ փաստաբան Գերասիմ Հարությունյանը մասնակցել և լրացրել է կիսամյակի համար նախատեսված պարտադիր 12 (տասներկու) ժամ ժամաքանակը:

Օրենքի 39.8-րդ հոդվածի 1-ին մասի 1-ին կետի համաձայն՝ *փաստաբանների պալատի խորհուրդը կարճում է փաստաբանին կարգապահական պատասխանատվության ենթարկելու վերաբերյալ վարույթն այն դեպքում, երբ՝ ... 1) բացակայում է կարգապահական խախտման դեպքը:*

Նման պայմաններում Պալատի խորհուրդը գտնում է, որ փաստաբան Գերասիմ Հարությունյանի նկատմամբ հարուցված կարգապահական վարույթը ենթակա է կարճման, հաշվի առնելով այն հանգամանքը, որ բացակայում է կարգապահական խախտման դեպքը:

Ելնելով վերոգրյալից և ղեկավարվելով «Փաստաբանության մասին» ՀՀ օրենքի 10-րդ հոդվածի 5-րդ մասի 14-րդ կետի, 39.7-րդ հոդվածի 5-րդ մասի 2-րդ կետի, 39.8-րդ հոդվածի 1-ին մասի 1-ին կետի, «Հայաստանի Հանրապետության փաստաբանների պալատի կանոնադրության» 16.26-րդ կետի, Կանոնագրքի հավելվածը հանդիսացող Փաստաբանի նկատմամբ կարգապահական վարույթի իրականացման կարգի 30-րդ հոդվածի 5-րդ մասի 2-րդ կետի, Պալատի խորհուրդը

Ո Ր Ո Շ Ե Ց '

1. Փաստաբան Գերասիմ Հարությունյանի (արտոնագիր՝ թիվ 914) նկատմամբ 10.12.2018թ. թիվ 432-Ա/ԿԳ-18164 որոշմամբ հարուցված կարգապահական վարույթը կարճել՝ կարգապահական խախտման դեպքի բացակայության պարճառով:

2. Հանձնարարել Պալատի աշխատակազմի ղեկավարին՝ սույն որոշման մասին իրազեկել փաստաբան Գերասիմ Հարությունյանին:

Ծանոթություն. *Սույն որոշումը կարող է բողոքարկվել դատական կարգով՝ այն ստանալու օրվանից մեկամսյա ժամկետում: Սույն որոշումն օրինական ուժի մեջ է մտնում սույն կետով նախատեսված բողոքարկման ժամկետն անցնելուց հետո:*

ՀՀ փաստաբանների պալատի խորհրդի
կարգապահական գործով
նիստը նախագահող՝

Հրանտ Անանյան

**08 մայիսի 2019թ.
թիվ ԿԳ/46-Ա
ք. Երևան**